

Parare Domino Plebem Perfectam

A lokisetse Morena Sechaba se phethehileng (Luka 1,17)

Moeletsi oa Basotho

www.moeletsiobasotho.co.ls

LDF e'a
oroaha



3

Tlhoko e
arabetsoe

6



Melata e e lata
Letailana

8



TK O E TSA THAPELI

8

www.moeletsiobasotho.co.ls



KETEKELO EA LILEMO TSE MAKHOLO A
MABELI SECHABA SA BASOTHO SE THEILOE

+266 28 350 466/
+266 6260 09 WhatsApp
newsroom@moeletsiobasotho.co.ls

#PARARE DOMINO PLEBEM PERFECTAM

MOELETSI

Fetola mohopolo

Boholo ba Basotho ba lla ka hore 'muso ha o tsotelle lithoko tsa bona haholo theko ea lijo e nyolohileng haholo, ho feta moo o leleka baitšokuli pel'a mebila. Potso ea bona ke hore na ha o ikeme o lokisa mebila tjee empa ba e-shoa ke tlala, hoo ho t'l'o thusa ka'ng? Ana tokiso ea mebila e bohlokoa ho feta bophelo ba sechaba? Sello se seng sa khale ke hore 'muso o litulong ha o thehe mesebetsi, joale le eo Basotho ba reng ba ithehela eona ke moo ba ntšoa mejo hanong. Morero oa 'muso ebe ke hore sechaba se shoelle ka tlung?

Taba ena e ka boela ea shejoa ka leihlo le leng hape; ha mebila e le maemong a matle ho tla ba bobebe haholo ho hohela batseteli ho nyolla moruo. Hape bahahluali ba tla khahloa ke ho etela Lesotho ha le e-na le mebila. Ka hona joalokaha Sesotho se bolela ha ho ntho e mpe e se nang molemo, hobane eona taba ena e lokisetsa khora; ha ho senyeha ke hona ha ho loka. Taba ea tlala ha se ntho e t'l'o fela hobane litheko tsa lijo li t'l'o lula li nyoloha joalo-joalo, 'me ha ho ka shebanoa le tsona feela naha e t'l'o lula e hafa ka nkatana hofihlela. Na ekaba ke phoso ho itlama mala-masesane ha nakoana feela hofihlela morero oo o phethahetse?

Leha ho le joalo o ntse o arabela tse ling tsa lithoko tsa bohlokoa hobane Tona-Khoho o qeta ho abela mahokela likobo tse 500, e le ho arabela kopo ea bona. Hona ho boetse ho arabela kopo e ileng ea etsoa ke Mokhetsoa oa Lebakeng mabapi le tšebetso ea mahokela, 'me hara tse ling o ile a lla ka lisebelisoa tse sieo. Le hoja molao oo e leng ntho ea bohlokoa o e-s'o tšetsethose empa tšepo le tumelo ke hore hanyane ka hanyane lintho li tla qetella li lokile. 'Nete ke hore lithoko li ke ke tsa arabela ka nako e le 'ngoe kaofela.

Mokhahlelo oa pele oa Sesole sa Lesotho (LDF) o neng o il'o e hlanaka Naheng Mozambique o fihlele kahar'a naha. Sena se latela qeto e ileng ea etsoa ke Lihlooho tsa Linaha tsa Afrika (SADC) hore masole ohle a naheng eo a khutlele malapeng. Tlaleho e supa maemo a khutletse setloaeling hoo sechaba se seng se ea masimong ho lema le ho kotula. Hona ke katleho e khoho ea boitelo ho masole a SADC ho thusetsa moo ntlo e chang, ho tloha ka selemo sa 2021.

Ka lehlakoreng le leng litsebi tsa rona tse re thusang kamehla bophelong ba botle, li re eletsa hore re tlohele litloaelo tsa khale tse re sitisang ho phela hantle. Sesotho se re e otlohoa esale metsi, ka hona ngoana o lokela ho khallengoa ho tloha a sa le monyenyanane ka lintho tse nyane tseo a li etsang. Ho mo lesa hobane u re li nyane ho tisa tloaelo ho eena hoo a ka qetellang a entse tse khoho hobane a tseba hore a ke ke a fumana khalemo. Ho se khalemele ngoan'a hau ke ho noesetsa lehola leo u sa le jalang nakong ea temo, batsoali hlaolang lehloa le le ntše ka metso.

Keletso e 'ngoe ke hore re thahaselle 'nete kamehla re tlohele ho itšetleha ka popelo e reng, "nete e'a baba" hobane eona e tla baba mothong ea sa e rateng a bile a ichebetse ho phela ka lethetsi. Ho na le polelo e reng tloaelo e fetoha, motho a ka phela ka mafofisa hofihlela kelello ea hae e lumela hore ke eona tsela e nepahetseng, ebe h'a soauoa mohlare oa loana. Ho eena batho bao ba fositse kaha a tloetse ho iketsetsa ka ho rata.

O khoaholla matšela-nokana

Tšelisano Thakholi

Tona-Khoho ea Lesotho, Ntsokoane Samuel Matekane o re sepheo sa 'moka oa baetapele ba Linaha tsa Afrika le Naha ea Korea, o bileng mathoasong a khoeli ea Phupjane monongoha, ke ho theha maqhama a tšebeliso 'moho le ho bulelana menyetla ea khoebisano lipakeng tsa South Korea le Linaha tsa Afrika.

tsa leeto la hae.

O supile hore Naha ea Korea e batla ho theha mesebetsi e ntlafatsang tlhahiso ea lijo, boikopanyo ba linaha toantšong ea ho fetoha ha boemo ba leholimo le ntlafatso ea tšebeliso ea linaha ka litikoloho. "Ho buisanoe ka hore na ke mafapha afe a ntlafatso ea bophelo ba sechaba a ka atemeloang ka tsela e tla akofisa khoebo, khoebisano, khoho le karolelano ea moruo. Re fumane litaba tsena li le molemo ho rona re le Naha ea Lesotho." A rialo.

A re ba hlile ba totobat-

gata mafapheng ao a mang a ona ho neng ho sa lem-ohehe joalo pele." O boletse joalo a bile a eketsa ka hore 'Muso oa South Korea o beheletse ka thoko chelete e kaalo ka \$10Billione ho thusa Linaha tsa Afrika ka nako ea lilemo tse tšeletseng, e tlang ho sebelisoa tlasa Mokhatlo oa Korea oa Ntšetsopele Machabeng(-KICA).

A bontša hore puisanong ea hae le Mookameli oa KICA, ba lumellane hore ba tlii'o thusa Naha ea Lesotho ka thepa e tla thusa naha ka tlhahiso ho ipapisitsoe le ho fetoha ha boemo ba



O buile tsena 'mokeng oa baphatlalatsi ba litaba Maseru, moo a neng a ba tekela melemo e phuthetsoeng ke

sa hona 'mokeng ona hore thahasello ea bona e khoho e litabeng tsa tlhahiso ea lijo, phehlo ea motlakase ka tšebeliso ea metsi, moea, matla a letsatsi, kanetso le ntlafatso ea likhokahano tsa marang-rang ho nolofatsa bophelo.

A re monyetla oa Lesotho ha se feela ho fihlela boitjaro mafapeng ana, empa ke ho fetoha bahlahisi le barekisi ba hloahloa mafapheng ao. "Sena se bolela ho araba lithoko tsa sechaba tsa mantlha, empa hape le ho hlahisa mesebetsi ka bon-

leholimo. Ho feta mona, a re 'Muso oa South Korea ka Letsete la Tšebeliso le Ntlafatso ea Moruo (EDCF), o fane ka \$14Billione ho likampani tsa South Korea ho tla tsetela Afrika ka morero oa khoebisano. A re 'muso o shebile merero e kang ea phepelo ea motlakase Oxbow, tsela e khoho e lebang Durban le ho fetolela temo khoebo. A tiisa hore Lesotho le mothating oa ho tla ananeloa e le e 'ngoe ea linaha tsa Afrika tse tlii'o imona monoana letseteng lena.

Contacts: +266 28350 466 / 6260 0983 (Whats app)
Email: moeletsioabasotho@gmail.com

MOELETSI oa BASOTHO
A LOKISETSE MORENA SECHABA SE PHETHILENG (LUKE 1:17)

Editorial

Lesoetsa Rakubutu (Editor)
(+266) 58490670 / 62031949
editor@moeletsioabasotho.co.ls

Lehlohonolo Mohale (Sub-editor)
(+266) 58 771 507 / 62 771 507
subeditor@moeletsioabasotho.co.ls

Advertising

Thabo Lesaoana
(+266) 28 350 466/ sales@moeletsioabasotho.co.ls

Newsroom

Nthabeleng Seithleko 57 665 038/ 68 216 721
nthabeleng.seithleko@moeletsioabasotho.co.ls

Tšelisano Thakholi (Sports) 58 540 853/ 63 480 404
tseliso.thakhuli@moeletsioabasotho.co.ls

newsroom@moeletsioabasotho.co.ls

Production Desk

'Mateele Liqa, Sr. Canicia Nthunya

BESP e tšehetsa batsoali

Nthabeleng Seitlheko

Ba bang ba baahi ba Ha Sekolopata, Seterekeng sa Thaba-Tseka ba re ba ikutloa ba imolohile kamor'a fumana litsiane tsa tlatsetso ho khutlisetsa bana sekolong le ho ba rekela seaparo sa sekolo hore ba tsoane le ba bang. Tsena li hlaheletse liphuputsong tse ntseng li etsoa ke Lekala la Ntšetsopele ea Sechaba, tlasa morero oa Lekala la Thuto le Koetliso oa ho matlafatsa Thuto ea Bana Likolong tse Bohareng (BESP), ka la 24 Phupjane monongoaha.

E mong oa ba fumanang litsiane 'Mathuso Temo oa Ha Sekolopata, ea lilemo li ka bang 30 ea nang le bana ba tšeletseng, o re ke bana ba babeli ba fumaneng lithuso 'me bona ba kena Sekolo se Phahameng sa Auray, kaha eena a iphelisa ka ho sebetsa mosebetsi ea malapeng kapa ho rekisa joala ba Sesotho.

O re litsiane tsena li mo thusitse haholo hobane o tlo rekela bana lithoko tse kang libuka le tse ling, eba joale o sokoloana le ho lefella lijo tseo a seng a kolota M800.00 ea tsona ho tloha ka khoeli ea Pherekhong monongoaha.

O ipilelitse ho lekala ho se khaotse ho ba tšehetsa ka chelete ena hobane bana ba bona ba tsoana le bana ba bang ebile ba na le thahasello ea ho ithuta.

Sekoala Lepheane, o itse o thusehile ka chelete ena kaha a atlehile ho rekela bana liaparo tsa sekolo, hobane esale a itšetlehile ka batsoali ba hae empa kamor'a hore ba hlokahale a sala a imetsoe ke bophelo.

O re lapeng la hae ba phela ba le robeli, 'me bana ba thusoang ba babeli e mong o kena Sekolong se Phahameng sa Mohale ha e mong a kena sa Mathomo sa Sekolopata. O re o fumana chelete e kaalo ka M600.00 ea malapa a tlokotsing, 'me ea seaparo sa sekolo o fuoa M1, 500.00 ngoana ka mong. O re o atlehile ho rekela bana lijisi tsa sekolo, lieta le libuka. O itse pejana o na phela ka ho rekisa liphoofole tse felileng ha joale, ka hona ke takatso ea hae ho bona bophelo ba bana ba hae bo fetohlile.

Ofisiri Lefapheng la Lihlapiso, Ntlo-Kholo ea Lekala la Ntšetsopele ea Sechaba Maseru Itumeleng Rapholo, o re ba ile ba hlokomela hore karolo e 'ngoe ea bana ba Ha Sekolopata



ha ba kene sekolo hantle kahoo ba etsa qeto ea ho bona hore ba bokella lipalo-palo tsa ba joalo, hore ba fumane litsiane tse ba thusang ho arabela lithoko tsa sekolo.

O re ba fumane hore batsoali ba sebelisa chelete ena ho latela litaelo tsa eona, 'me ba bone hore ho thusa ka seaparo sa sekolo ho theotse palo ea baithuti ba neng ba tsoa sekolo har'a nako. A re ba hlokometse hore ka lebaka la karo-

lo e 'ngoe ea batsoali ba sa kenang sekolo, ha ho be le tšusumetso ea hore bana ba kene sekolo, ebe ke qholotso e 'ngoe ke ea ba bollang le ho nyaloa ba le banyenyane. Ke bana ba 47 ba fumanang litsiane tsena kanseleng ea Tenesolo.

O re ngoana o fumana thuso haeba a le kahara sekolo 'me mokhahlelong oa pele o fuoa chelete e kaalo ka M1, 000.00 ebe e eketsoa ka M500.00 mokhahlelong oa bobeli. O bontšitse hore

ba etsa tšalo morao likolong ho bona hore chelete ena e fela e arabela lithoko tsa baithuti.

Raliphatlalatsa Lekaleng la Thuto le Koetliso, Moli-kuoa 'Mota Sekhonyana, o supile hore mosebetsi oa Lekala la Thuto le Koetliso ke ho bona hore bana ba kena sekolo ebile ba fumana thuto ea boleng. O re Likolong tsa Mathomo ho ile ha hlokomeleha hore bana ba bangata hobane thuto e lefelloa ke 'muso, ha li-

kolong tse bohareng lipalo tsa baithuti li theohile kaha e le nako eo batsoali ba lokelang ho lefella bana.

O re ba ile ba tla ka morero oa BESP oo mosebetsi oa ona e leng ho thusa ho khutlisetsa bana likolong ka ho arabela lithoko tsa bona tsa sekolo, ho tloha ho moithuti oa Grade 8 ho ea holimo e le ho khahlametsa bana ba hlohang. O re sena ba se etsa ba ipapisitse le lipehelo tsa machaba tsa hore ngoana a fumane thuto ea boleng.

A bontša hore morero ona o ile oa fetisetsoa Lekaleng la Ntšetsopele ea Sechaba, ho bona hore o sebetsana le ho thusa baithuti ba joalo, kaha ba se ba e-na le sesiu sa bana ba hlohang.

Lebitsong la Morena 'Matlhohonolofatso Sekolopata, o re o ithutile hore batsoali ba ntse ba sebelisa chelete ena ka mokhoa o nepahetseng, 'me ho na le malapa a hlohang lithuso le bana ba kenang sekolo ka matla ka lerato. A re chelete ena e fetotse bophelo ba bana ba bangata ba phelang tikolong ena hobane ba neng ba sa kene sekolo ba ile ba atleha ho khutlela sekolong eleng ntho e kholo.

LDF e'a oroha

tho Lt. Sakeng Lekola, puisanong le Koranta ka moha-



Nthabeleng Seitlheko

Ebile thabo le monyaka ho malapa a neng a le boema-fofane ba Mo-shoeshoe I, ha mokhahlelo oa pele oa lebotho la boraro oa Sesole o neng o rometsoe ho ea e hlanaka Mozambique o rotha kahar'a

naha. Tsena li bile ka la 23 Phupjane monongoaha.

Sena se latela qeto e neng e etsoe ke Lihlooho tsa Lina-ha le Mebuso (SADC) ea ho hula masole a neng a e hlanaka naheng eo kamor'a ho ithuta hore maemo a ntoea a tsitsitse. Litsi tsa bophelo, likolo li se li butsoe kamora hore Sesole sa Lesotho se sebetse ka thata ho tsitsisa maemo sebakeng seo.

Phala ea Sesole sa Leso-

la o hlahositse hore masole a bile moo ka mokhahlelo oa pele ka selemo sa 2021, oa bobeli o bile ka selemo sa 2022 oa boraro ka sa 2023, 'me ho fihlela ha joale ba tsebile ho etsa mosebetsi.

A re ha ba fihla ba fumane metse e kaholimo ho 50 e le sieo le tsamaiso ea marena a neng e le sieo, ha joale sechaba se phela ka khotso se lema masimo, sea kotula, 'me sena se pa-

kahatsa hore ba atlehile ho fihlela 100% ea mosebetsi oa bona ka hona ho se ho setse tsamaiso ea naha.

O re thomo ea bona e tla fihla pheletsong ka la 15 Phupu monongoaha, e leng letsatsi la ho qetela leo SADC e laetseng hore masole ohle a be a le sieo naheng eo.

A re ha joale Lesotho le phuthile thoto eohle ea lona Naheng ea Mozambique, 'me ho lebeletsoe hore mokhahlelo oa ho qetela o fihla neng kapa neng. O re ba bile kahar'a mosebetsi o boima naheng eo, 'moho le masole a Tanzania ba le 120.

O re ha masole a tsoa maemong a hloabaesang a ntoea, ba lokisoa ka likelelong le ho thojoa maikutlo ke litsebi tsa masole le tse tsoang ka ntle ho naha, 'moho le ba malapa a bona, 'me ho se ho le boikutlong ba motho hore o nka nako e kae, a ntse a tsamaea leeto lena.

H'a phethela o hlahositse hore Basotho ba utloisise hore sesole se teng kahare ho naha, se tla sebetsa tlasa litaelo tseo ba li nkileng taelong ea Motlotlehi, ba sebetsa hape tlasa taelo ea molao oa motheo le oa sesole.

RE TŠEHETSA BACHA

Tšeliso Thakholi

Matsatsing a morao tjena batho ba bacha ba ikakhetse ka setotsoana likhoebong, tlasa tataiso ea morero oa kholiso ea likhoebo tsa bacha o bitsoang Sebatatso. Ba theha likampani ka bo-mong esita le ka boikopanyo. Empa seo boholo ba bacha ba se hloakang ke tšehetso ea lichelete ho holisa likhoebo tsa bona le ho hlahlelloa ka malebela mabapi le tsamaiso e nepahetseng ea khoebo. Har'a bacha bana ba ikakhetseng ka setotsoana ho holiseng khoebo, ke mocha ea bitsoang Temoho Khatleli.

Rakhoebo enoa ea sa leng monyenyanane haholo lilemong o thehile kampani e bitsoang Bohloeki Enterprises. Khoebo ena ea hae e baballa tikoloho ka ho e boloka e hloekile, ka ho bokeletsa lithaere tsohle tsa likoloi tse seng li sebelisitsoe, e be ea li qhibilihisa e etsa Oli e Tala (Crude Oil). Kampani ena eo e leng ea pele ea mofuta oa eona kahar'a naha e tlišitse liphetho tse ngata bophelong ba sechaba ka ho fa Basotho bangata mosebetsi joaloka ba rekisang lithaere, bakeng



sa ho iphelisa le ba hiriloeng ka kotloloho ke kampani. E boetse e thusa sechaba litabeng tsa bohloeki ba tikoloho le sepaka-paka ka ho ba khotlaetsa hore ba se ke ba chesa lithaere kaha li silafatsa moea. Abuti Temoho h'a bua le ba Moeletsi oa Basotho o li beha tjena:

Ke ne ke ile ka ithuta hore lintho tse kang li-plastic, li-pampiri le makoti-koti lia hlekoa hohle mona, ebe ho

na le moo li romeloang teng moo li il'oa siloa ho boetse ho etsoa lihlahisoa tse ling hape. Empa haele lithaere ka hlokomela hore tsona li tletse hohle mona li bakile bohlasoa le ho silafatsa tikoloho ha ho batho ba li tsotellang. Ka qala ka etsa boithuto ka marang-rang hore na ebe re ka li hleka joang ho baballa bophelo ba sechaba le tikoloho. Ka fumana hore re ka liqhibilihisa ra hlahisa Oli e Tala.

Ka theha kampani ena 'me hang hoba ebe teng, ka lithuso tsa e 'ngoe ea likampani tseo ke neng ke sebetisa ho eona, 'moho le banka ka qala pele ka ho reka mochini o boemong ba machaba, o tla thusa ho qala mosebetsi ona. Ka tataiso ea setsebi sa tlhokomelo le paballo ea tikoloho ra atleha ho qala mosebetsi ona.

Tlhahiso le 'maraka;

Ka khoeli bonyane re hlahisa lilitara tse 9,000, 'me re

e romella Naheng ea Afrika Boroa, ebe bona ba hlahisa Diesel le tse ling tse ngata.

Bokamoso ba kampani;

Re lakatsa ho bona re anetse Lesotho lena kaofela, re phutha bohlasoa bona ba lithaere tse tletseng hohle mona. Re boetse re rata hore re ke re be le feme e kholo, e etsang mosebetsi o tšoananag le o etsoang ke Afrika Boroa ka Oli ena, e le ho fumantša Basotho monyetla oa ho iphelisa. E kholo ka ho fetisisa ke hore re ba tla ho ba le Energy Hub, e tla re thusa ho ithahisetsa motlakase oa malapeng ka mokhoa o bobebbe. Re batla ho fetotela Oli ena ho Diesel ka kahare ho naha bakeng sa tlhahiso ea mesebetsi.

Khotlaetso ho bacha;

Mocha ka mong ho ke ho be le ntho eo a e lorang ho fetola bophelo ba hae, le hoja ka linako tse ling batho ba bang ba tla lieha ho utloisisa hantle toro ea hae, empa a tsoelepele ho e phethahatsa molemong oa hae le sechaba sa habo. Bacha le se ke la lebella hore mona khoebong ho bonolo, khoebo ke ntho e thata e hloakang mamello le lerato. Basotho ba heso, ha re tšehetseng likhoebo tsa bacha li tle li tsebe ho hola. Mamati a butsoe ho lona bacha ho re etela ho tla ithuta le ho bona hore na re ntse re etsa'ng.



Truth hurts, is it true?



Teboho Matjeka
58911803 / 63574502

Most of us grew up with a notion that truth hits hard and hurts. When one thinks deeply about this statement we realise that it encourages lies. Let us be realistic here, none of us wants to be notorious of hurting people. If we were made to choose between telling a lie or hurting someone, most of us would rather lie. The statement, "truth hurts" has hurt our nation so much, we are now a nation of liars, we have been socialised to lie and still find no problem in that. I don't know if we are aware that the truth will only hurt those comfortable with lies and benefit from those lies. Those who are not comfortable with lies and are solution-oriented will never find solace in lies. We should learn that if we are comfortable in a state of lies, truth becomes foreign and solutions to the social ills that we have can never be found. It is high time that we teach those around us that it is better to hurt each with truth than to mislead each other with lies. When we have managed to mislead people with our lies, they love not who we are but the image we created, let us show our true self, tell the truth and attract the right people.

ELEGANCE COUTURE

FABRIC THAT SPEAKS

ELEGANCE COUTURE; AN ALL TYPE OF CLOTHING BUSINESS SITUATED AT **TRADORETTE BUILDING ROOM B22** IS YOUR ONE WAY STOP FOR ALL ELEGANT AS WELL AS CASUAL, SOWN CLOTHING.

WE PRIDE OURSELVES IN DESIGNING AND MAKING HEAD TURNING CLOTHES FOR ALL AGES AND GENDERS.

SO DON'T MISS OUT ON THEIR SALE THESE MONTHS FOR GRADUATING STUDENTS AS WELL AS THOSE GOING FOR PROM.



FACEBOOK AS ELEGANCE COUTURE
INSTAGRAM AS ELEGANCE COUTURE



www.moeletsiabasotho.co.ls

58524642 WhatsApp/ Call

Tlhoko ea baahi e arabetsoe

Nthabeleng Seitheko

Sechaba sa leba-tooa la Lebakeng, se motlotlo ka Setsi sa Bophelo se ahiloeng sebakeng seo hobane ke karolo ea polokeho ea bophelo ho bakhachane le batsoetse kamor'a tšotleho ea nako e telele. Tsena li boletsoe ke mosebeletsi oa tsa bophelo motseng, 'Makananelo Phafoli puisanong le Koranta ka mohala, ka la 24 Phupjane monongoaha.

O re bakhachane ba ne ba pepela tseleng hobane ba nka maeto a matelele ho fihla litsing tsa bophelo, ka hona ho buloa ha mapolata ho t'ho thusa bophelo ba 'm'a le lesea, kaha ha mokhachane a ne a bile le ngoana leetong la ho leba setsing, bophelo ba ngoana e ne e ba bothata 'me taba ena e etsahetse ho basali ba 'maloa sebakeng sena. O re tlhokahalo ea litšebeliso kahar'a metse e ama bophelo bo botle le kholo e nepahetseng ea ngoana hobane bana ba bang ha ba tsamae liente hantle hoo ba qetellang ba e-na le bokakachelana ka lebaka la ho se hlokomelehe hantle.

Mookameli oa Litšebeliso tsa Bophelo, Seterekeng sa Qacha'sNek 'Mapaseka Letsie, o supile hore bakhachane ba khothalletsoa ho ba setsing sena libeke tse 34 pele ho pelehi ho qoba ho pepela tseleng le tahlehelo ea bophelo ba lesea ho latela leeto leo ba le nkang ho fihla setsing. O re hona ho tla ba thusa hore e bang mokhachane a kopana le mathata nakong ea pelehi kapa ho se phele hantle a fetisitsoe Setsing sa Bophelo ka nako.

O re mafu a mangata a ama lesea ka lebaka la tlhokahalo ea lisebelisoa leha ho le joalo ba lakatsa ho bona Litsi tsa Bophelo li anetse li bile li fihleleha ha bobebe kahar'a metse eohle.

Mokhethoa oa Lebakeng Letsekang Moloi, o itse litšebeliso tsa bophelo ke tlhokahalo ea mantlha kahar'a sechaba, ka hona li lokela ho ba teng 'moho le lisebelisoa tse kang lithlare le li-



koloi tse nkang bakuli ho ba lebisa sepetlele hore bophelo ba sechaba bo bolokehe. A re ha joale ba tobane le bothata ba tlhokahalo ea litsela, le fumane likepe ha

ba li fumane habonolo ka lebaka leo o se a e ntse kopo ea hore ba etsetsoe borokho ba Tebelling.

Lebitsong la Letona la Bophelo Mohlomphehi Ste-

phen Mputi, o supile ha ba ikemiselitse ho anetisa phano ea litšebeliso tsa bophelo ho sechaba, kaha le Mokhatlo oa Letatše oa Bophelo (WHO)

o khothaletsa joalo. A re marontabile ana a tlo etsa hore bakhachane ba seng ba le haufi le nako ea ho pepa, ba fetele litsing tse ling tsa bophelo ka nako.

Nontša sejalo e se lehola

Molemi o loki-sa mobu esale pele h'a tla kenya peo mobung. A tšele monontša hore ha peo e fihla e tle e mele ka katleho. Ha molemi a jala, o jala feela peo ea sejalo seo a lebeletseng ho se kotula. Ha nako ea ho mela e fihla ho tla mela lipeo tsohle tse teng mobung, le tsa mahola 'me molemi h'a na taolo holim'a tsona. Ha limela tseo ntse li hola o tla hlaola lehola a siee lijalo hore a tle a tsebe ho ba le kotulo e ntle.

Re nke papiso ena re e bapise le kholo ea ngoana thutong ea hae, h'a ntse a hola joalo ho na le moo a ka fuoang kantle ho letsoho. Ekaba methaka kapa thuto eo a inkelang eona ho baholo ba hae leha ba se na morero oa ho mo ruta lintho tse joalo. Ka baka la kelello e mahlaha-hlaha thuto e 'ngoe le e 'ngoe e thophothela kapele, mona hee ke moo motsoali kapa moholisi a bapalang karolo e kholo ea molemi: e ba ke moo a tlamehang ho lula e le 'mesa-mohloane hore a tle a bone lehola ha le nan-



arela sejalo sena sa hae.

Mohlala; maemong a ha ngoana a fihla lapeng le lintho tse sa tsejoeng, ekaba o utsoitse kapa o li nkile ka tumellano, haeba motsoali a sa khathalle ho etsa tšalo-morao hore na ke tsa bo-mang, li tlike ka sepheo sefe? O nontša lehola. Litloaelo tse joalo li hola le motho, ebe o qetella a se a tloaetse ho kena feela ka lintho tse sa tsejoeng hoo a

ka nolofalloang ke ho utsoa.

Ke litloaelo tse ngata tse fosahetseng tseo hangata ha bana ha ithutile tsona ho tsoa ho baholo ba bona li rehloang ka lefutso. Ke bontšitse pejana hore tse ling ba ithuta tsona ka ho li bona khafetsa ba be ba qete ka hore mohlomong ke hona ha ho nepahetse, tsena ke lintho tse kang lintoa, botaoa, bohloa le tse ling tse tšoanang le tsona

haholo h'a bile a kenngoa kahar'a tsona mohlomong a etsoa morumuo kamehla. Lintho tseo ngoana a holelang kahar'a tsona ekaba li ntle kapa li mpe ho eena ke thuto, empa ho tla sallana le motsoali hore o fothola lehola kapa oa le nontša.

Re phela nakong eo ho nang le batsoali ba reng bona ba ke ke ba lumela hore bana ha bona ba hole ka ho tšoana le bona, sena ba se buisoa ke ho lumela hore ba ne ba sotloa ha ba rutoa ho tšoara ka thata: Uena u holisitsoe joang? U nahana batsoali ba hau ba fositse? Ke lipotso tse 'maloa tseo motho a ka ipotsang tsona. Empa 'nete ke hore re holisa moloko o reng, "hoja ke ile ka tseba esale pele." See re ka se fetola joang? Mohlomong ke maemo ao re seng re phela kahar'a oona a re sitisang ho tsitsisa metheo ea ngoan'a Mosotho, empa ka lihlopha tsa tšehetso (methaka) ke lumela hantle hore re ka fenyha bothata bona joalo ka linakong tse fetileng.

Sepheo le cheseho ea mosebetsi



Nthabeleng Seitlheko

Mokanselara oa Lekhotla la Puso ea Sechaba (DC) Phomolo Mpobole oa Liphiring Ha Lehlabela, o khotalelitse bacha ho kena temong ka bongata hore ba tsebe ho hlola mathata a tlhokahalo ea mesebetsi. Tsena o li hlalositse, puisanong le Koranta ka la 24 Phupjane monongoaha.

O re bacha ba linaha tse ling ba sebetsa ka matla ho ithahisetsa le ho rekisa mapatlelong a linaha tsa habo bona 'me seo se etsa hore ba tsebahale. A re seo a se bonang ke hore

re na le naha e lehlohono-lo e nang le metsi le mobu, bomalimabe ke hore bacha ba mehleng ena ba fetotse matsoho masoto, ba behile likelello tsa bona ho hiroeng e seng ho ithahisetsa.

A re boikopanyo bo bohlokoa hobane ba tseba ho hlola liqholotso tse ngata, hobane khaello ea litsebo ke bothata bo bong bothata bo amang kholo ea khoebo. A bonts'a hore naha e hloka mefuta e fapakaneng ea lijo ho ntlafatsa moruo.

Mpobole o itse o ne a qale ho kena temong ka selemo sa 2020, 'me o qalile khoebo eo ka chelate eo a ileng a e bokella nakong eo a neng a sebetsa Afrka Boroa le mokh'ukh'u oo a neng a phelisa lelapa la ona. O

tsoelapele hore ntata'e mohlolo o ile a rekisa likhomo tsa hae hore a tsebe ho kenya mekhoha ea noesetso masimong ho hlola maemo a phetoho ea leholimo, kaha lijalo tsa bona li ne li otloa ke komello.

ho qala ka chelete e ngata ho boima hobane temo e liqholotso tse kang seoa sa likokoanyana, komello le tse ling.

O re maemo a phetoho ea leholimo a teng a ba ama haholo empa ba lokela

bane le ntho e le 'ngoe a etse mefuta e fapakaneng ea temo.

A bonts'a hore ha joale o leetong la ho tla thusa metse e fapakaneng ho hlalaha temo e tsoeleletseng molemong oa tlhahiso e



O hlalositse hore ha se phoso ho batla lithuso empa bacha ba ka qala ka lintho tse nyenyane tse sa hlokeneng mosebetsi o mongata kapa mobu o mohlolo joaloka mokopu. O re ntho e kholo ke sepheo le cheseho ea mosebetsi o motho a o etsang.

O re o qalile ka ho lema moroho a sa tsebe le ho le hlalohanya lipeo tse potlakileng le tse liehang. A re

ho ithuta hore na b'a hlola joang. O re o etsa sethopho sa meroho ka likhoeli tsa Phato le Loetse ho leka ho hlola boemo bona, ka hona bohle ba lokela ho tla ka mahlale a ho hlola boemo bona kaha ba se ba tlo phela le ona. A boela a re maemo a leholimo ha sitise hore motho a ka lema kaha ho na le batho ba kotutseng har'a ona. O re ho bohlokoa hore ha motho a lema a se she-

ntle, ntlafalo ea bophelo ba sechaba le moruo oa Naha ea Lesotho.

O re hona joale ha e-s'o ngolise khoebo ea hae ea temo ka molao, kaha ho lateloa methati e metelele.

H'a phethela o ipilelitse ho bacha ho ema, ba ts'oarane ka matsoho litabeng tsa temo kaha e le eona e thusang hore malapa a phele le mesebetsi e be teng ka-har'a metse.



Melata e tsekisana le baitšokuli

Nthabeleng Seithleko

Mothehi le Moetapele oa Lekhotla la Tokoloho ea Sechaba (BDC) Molibeli Soro, o re moruo oa pele oa naha efe kapa efe ke sechaba se matlafatseng se nang le bophelo. Tsena li hlaleletse puisanong le Koranta ka la 24 Phupjane monongoaha.

O re sechaba ha se tšoarehile hantle, Litokelo tsa Mantlha tsa botho li hlompheha, se e-na le litokomane tsa boitsebiso, libukana tsa ho eta, ho thusa bolokolohi hobane ho etsa joalo ho kenya kholong ea sechaba le moruong oa naha.

O re 'muso o lokela ho bona hore sechaba ha se robale se itsosa hape se bolokehile khahlanong le lipolao le liretlo molemong oa bolokohi. A re taba ea hore ha joale Basotho ba ntse ba e-shoa ke lipolao ho bolela hore naha e na le bothata tsamaisong.

O re ba lokela hore lihlo-liloeng le lirafshoang tse hlahang kahar'a naha li rafshoe ka mokhoa o nang le ponaletso e be Basotho ba



kapele litabeng tsena, kuno e tlang kahar'a naha e tsebe ho phahama. A re melata e nkile mojao ho feta Basotho khoebong tsa merafo, ka hona moruo o ke ke oa hola

ha naha e ntse e fumana 41% ea kuno merafong, ha melata e nka chelete e ngata.

O supile hore lilekane tsohle tseo muso o kenang

ho tsona li lokela ho hlajoja bocha joaloka metsi a lihlabakaha sechaba sa Basotho se ntse se reka metsi empa linaheng tse ling sechaba se a fumana mahala. A elet-

sa 'muso ho hohela bo-ramatsete e le ho phahamisa botseteli bo matlafatsang naha.

A re 'muso o litulong o hlalise mesebetsi kahar'a naha le mabenkele a lokelang ho ba matsohong a Basotho ho kenngoe melao tšebetsong e le hore likhoebo tsa Basotho li khutlele ho bona. A tsoelapele hore o matlafatse bophelo ba Basotho ba ba inole khatellong ea melata, kaha moitšokuli a tsekisana mosebetsi o le mong le molata. O itse o tlameha ho bokella makhetho ka tsela e nepahetseng, moo ho se nang tsamaiso ea molao ha ho na hore moruo o ka hola hobane e mong le e mong o iketsetsa borata.

Ha phethela o khothalelitse hore likhoebo tse nyenyane li tlohe matsohong a melata, ha e kena kahara naha ba kene ka likhoebo tse kholo, baitšokuli ba abeloe libaka tse ntlafalitsoeng moo ba tla sebeletsa teng, ba thusoe ka liphallelo hore ba tsebe ho hlahisa le ho matlafatsa khoebo. A bontša le bohlokoa ba hore litorotsoana li ntlafatsoe 'moho le metse ka litsela.

TK o etsa thapeli

Nthabeleng Seithleko

Ele mohato oa ho kenya letsoho, ho fenyala litlolo tsa molao tse jeleng setsi kahar'a naha le ho ela hloko tšebetso ea mahokela, Tona-Kholo, Samuel Ntsokoane Matekane o nehelane ka likobo tse 500 ho Mahokela a Ha Matlali, ka la 21 Phupjane monongoaha.

E mong oa Mahokela Ke-fuoe Phate, o lebohile mpho ena hobane ke tlhokahalo ea lisebelisoa ka hona ba ipiletisa ho bo-mphato'a bona ho tlohela ho thatafatsa tšebetso ka ho pata litlokotsebe malapeng a bona. O re hona ke tlotla e kholo kaha ba lula mesikong ea lithaba ba bolaoa ke serame. A re qholotso e kholo ke bosholu ba liphoofole bo etsoang ke batho bao ba ba tsebang, bao bohola ba nako ba patoang ke bona, 'me ka ho etsa joalo ba ichekela lebitla.

Mookameli oa Sepolesa sa



Qacha 's Nen Supt. Thembi Nkosi, o supile hore ketsahalo ena e kholo tšebetsong ea mahokela hobane ke batho ba sebeletsang sechaba ho hlola botlokotsebe kahar'a metse kahar'a lirame tse matla.

A re ho theoa ha mahokela seterekeng sena, ho bile ha qholotso hore naheng ea boahelani Matatiele ho theoe mahokela a bitsoang Peace Community, ba kopanang 'moho ho thakelana ka malebela le ho hlola liqholotso

tsohle tsa bosholu lipakeng tsa meeli ea linaha tsena. A re seeterake sena se atetsoe ke bosholu ba liphoofole bo hlokaneng sechaba se tšaraneng ka matsoho ho thusana hore bophelo ba bohle bo sireletsehe.

Tona-Kholo Samuel Ntsokoane Matekane, o supile hore mahokela a ile a etsa kopo ea ho fuaa likobo tse

500 'me ba fetse ba phethalitse. A kopa bao ho itella mesebetsi oa bona hobane Naha ea Lesotho e atetsoe ke litlolo tsa molao le lipolao tseo ba lokelang ho thusa mapolesa ho li hlaola kahar'a metse.


A re ba sireletse thepa le liphoofole tsa Basotho ka lerato lohle hape ba boulele kholo ea sechaba metseng. O re sena se ka thusa hore lintlafatso li etsahale ha bobebe le batseteli ba be teng habonolo.





MOB KIDDS EDUTAINMENT

TLOTLONTSOE



Across


- 1 Moketjana oo ka oona ho lebohuoang basali ba ileng ba thusa motsoetse ka ho mo khella metsi le ho mo isetsa masheleshele (6)
- 3 Linku tse leshome ha ho thethesoa bohali (7)
- 4 Mekhoa le litloaelo tsa sechaba. (6)
- 6 Mosali oa bobeli kapa ho feta lenyalong la sethepu.(7)
- 9 Ngoan'a bo mosali oa ka. (5)
- 10 Joala bonooang ha ho isoa likhomo tsa mahali, Joala ba.... (4)
- 11 'Mantja, Matšelis, Tšelis, Ntja le Mpe; mabitso ana a rehoa..... (6)
- 13 Pere e tsamaeang le likhomo tsa bohali (8)
- 17 Maqothoane a sebete le moholu a pheheletsoeng moho. A jeoa ke maqhekoana a habo banyalani. (7)
- 20 se chekoa ke pelo (maele) (7)
- 21 Sefaha se kenngoang molaleng oa ngoana e monyane ka tumelo ea ho mo tiisa khahlanong le meea e mebe kapa ntho tse mpe. (7)
- 22 Kobo ea bohali (11)
- 23 Mosali ea nyetsoeng, o bitsoa..... lelapeng la bo monna. (7)
- 24 Thakane ea bashanyana (8)


Down

- 2 Ngoana ea hlokahelletsoeng ke motsoali. (8)
- 5 Ntlo ea banyalani ba bacha (7)
- 7 Ho bontša ngoana khoeli e phethileng sekhoanana ka mora khoeli tse tharo a hlahile ho pheta moetlo oa Sesotho. (8)

- 8 Ha lea tlala, le ho bontša ho halala likhomo tsa bohali (6)
- 12 Monna oa morali oa rona. (11)
- 14 Basali ba mophatong (10)
- 15 Mosali ea nyetsoeng ke monna oa ausi oa hae. (7)
- 16 Khomo e hlabeleang lingoetsi ha li felehelitse ngoetsi e ncha. (7)
- 17 Linama tse thakhisang lekoko (mehlolloane,metso, thukela, molibolo oa qaati, leru,, khubu, le malolo (8)
- 18 Khoeli eo ngoetsi e tlotsoeng ke khoeli ka eona (7)
- 19 Khomo e kopa nyang malapa a mabeli ka lenyalo. (6)

SOLUTIONS: MoB92-4532





TSA KEREKE

Mobabatsehi o fuoa thomo



Staff

Mopapa Francis o khethile Mongoli oa nako e telele oa Mofu Mopapa Benedict XVI, Moarekabishopo Georg Ganswein ho ba Moemeli oa Linaheng tse Kopaneng tsa Baltic States tse kenyeletsang har'a tse ling Lithuania, Estonia

le Latvia. Mobabatsehi Ganswein ea lilemo li 67 o tlahoa ke koranta ea Vatican hore ha a qala tšebetso ena ea leeto la hae la bolisa, a sebelitse e le Mongoli ea Ikhethang oa mofu Mopapa Benedict XVI nakong eohle ea bopapa ba hae ho fihlela a tlohela mosebetsi. Tlaleho e supa hore Moarekabishopo Ganswein o ne a khethoe ke mofu Mopapa Benedict XVI ho ba Mookameli oa Lelapa la Mopapa ka Tšitoe 2012. Ka Pherekhong selemong se hlahlamang o tlahoa a ile a tsoe-

lapele ho tšoara maemo ana ka bobeli kamor'a hore Mopapa Benedict XVI a itokolle. Ho fihlela selemong se fetileng, Moemeli oa linaheng tse tharo tsa Baltic e ne e le Moarekabishopo Petar Rajic oa Canada ea neng a tsoa Bosnia-Croatian, ea ileng a khethoa ke Ntate ea Halalelang, ka la 11 Tihakubele ho ba ho la Italy le San Marino. Ka lebaka lena, tlaleho e supa hore Kereke ea Baapostola e lutse e sena motho ho fihlela joale.

-Vatican News-



2023-2024 SELEMO B

Sontaha sa 13 har'a selemo

Bohlale 1,13-15;2,23-25

Pesalema 29

Ba-Korinthe 8,7.9.13-15

Mareka 5,21-43



Khothatso

Bophelo bosafeleng 'Musong oa Molimo

Bophelo bosafeleng ke'ng? Ba bang ba na le bona empa ha ba tsebe, ha ba bang ba se na bona ba ntse ba bo tsoma le hoja ba qhelela thoko mekhoha e teng ea ho bo fumana. Ho lehlohonolo ba nang le bona 'me ba tseba. Mangolo a Halalelang a bua sena mabapi le bona, "Bophelo bosafeleng ke bona, hore ba u tsebe u le Molimo ea mong oa 'nete le Jesu Kriste eo u mo romileng." (Joannes 17:3)

Ho tseba Morena ho hloka hore u be le likamano le eena, 'me ho ba le bophelo bosafeleng ke ho tseba Morena joalokaha a itseba e le hore u tsebe ho natefelo a ke likamano le Eena 'Musong oa hae oa Leholimo.

Lipalo tsa kajeno li bua ka mpho ea bophelo bosafeleng; Thuto ea Pele ho tsoa Bukeng ea Bohlale e ruta hore Morena Molimo h'a bopa lefu, o bopile tsohle hore li phele ebile ha khahloe ke lefu la libopuoa tsa hae. (Bohlale 1:13-5) Mangolo a Halalelang a le ruta hore le tlohele ho nahana hore lihele li teng lefatšeng, 'me bohle ba nahanang joalo ke hobane ba iketselitse tsona. (Bohlale 1:14)

Empa ho bohle ba phelang ka tsela e lokileng ba sheba bophelo ka tsela e fapakaneng hobane ba phela ka tšepo ea bophelo bo tlang, eleng bosafeleng 'Musong oa Morena Molimo. Le hoja e le ba lefatše lena lipelo tsa bona li ho Kriste eo e leng tšepo ea pholoho e tšepisitsoeng ba phelang ka ho loka tumelong ea bona ho Kriste.

Ka lebaka la sehlabelo sa Kriste le na le bonnete ba hore le tla fumana bophelo bosafeleng. Morena Molimo o le bopiloe le sa shoe ka tšoano le eena (Genese 1:27; Bohlale 2:23) le tsebe ho ba le kabelo 'Musong oa hae. Ba khopo ba ea timelong ke hobane ba ikhethetse joalo, 'me motho hore a qobe ho timela o lokela ho ipeha pel'a Morena kamehla, ho nchafatsa likamano le eena ka ho atamela grasieng ea hae e fumanoang haholo Lisakramenteng.

Evangeling le bona Kriste ea arolelang ka lerato, hobane o tsoitse morali oa moruti bafung eo ntata'e a neng a e-na le tumelo ho eena. Kannete ruri haeba Kriste o na le matla a ho tsoa bafu hona ho bolela hore matla ke ea hae a ho fana ka bophelo bosafeleng 'Musong oa Morena leseling ho bohle bao a ikhethetseng bona. Ka lehlakoreng le leng le utloa mosali ea ileng a fola phallong ea mali ea lilemo kamor'a ho tšoara seaparo sa Kriste. Tumelo e kana eo a neng a e-na le eona e mo lopotse mahlokong a lilemo tse 12.

Bophelo bosafeleng bo fumanoa ka grasia ea Morena empa motho o lokela ho etsa mesebetsi e metle e susumetsoang ke Moea oa Halalelang. Bana beso haeba re re na le tumelo ho Kriste re sa khanye ka mesebetsi e metle, re shoele (Jakobo 2:26). Metso ea mpho ea rona ea bophelo bosafeleng ke Morena Jesu Kriste 'me ka eena re tla kena 'Musong oa Molimo Ntate joaloka bana ba hae.

Bahalaleli har'a Beke

- 1 Phupu Gall
- 2 Phupu Aceses
- 3 Phupu Thomas
- 4 Phupu Utric
- 5 Phupu Marinus
- 6 Phupu Noyala



LeFA e fina selelu

Tšeliso Thakholi

Mokhatlo oa Lesotho o Tsamaisang Papali ea Bolo ea Maoto (LeFA), o finne selelu ho ntlafatseng papali ea bolo ea maoto selemong se secha sa lipapali, ka Lenane la ona la Lithuso (LAP), leo ka lona o tliil' o fana ka libolo tse 4,000 tsa boleng ba chelete e kaalo ka M1.3Millione, mekhahlelong ea lihlopha tsa A, B le C tse ingolisitseng le LeFA. Sena se hlaheletse 'mokeng oa baphatlalatsi ba litaba o neng o tšoaretswe Bambatha, Maseru ka la 24 Phupjane 2024.

President ea LeFA, Adv. Sa-lemane Phafane KC o boletse hore sehlopha ka seng se tliil' o fuoa libolo tse hlano tsa mefuta e sa tšoaneng. A bontša hore libolo tse tharo ke tse tla sebelisoa sebakeng sa letsatsi ka leng, tse etselitsong boemo ba mabala ao lihlopha li bapallang ho ona, ana a thata a mekurutloane. Athe tse peli tsona ke tse bitsoang FIFA Match Day, tse tla sebelisoa feela nakong eo sehlopha se



bapalang lipapali tsa sona tsa liki, tsa litholisano kapa tsa setsoalle.

A re ka lithuso tsena ho

lebeletsoe hore ho bonahale kholo le phethoho boemong ba lihlopha tsohle. A re tebelo ke hore lihlopha li il' o etsa

mosebetsi o tsoileng matsoho. E re kaha ho se tsela e se nang moepa, a re ba ithutiele mokhahlelong oa pele oa pha-

no ea libolo hore ho bile le lihlopha tse ling tse sa kang tsa hlomphelele le ho ikobela phano ea libolo tsena, ka ho sebelisa bolotsana ho ingolisa hararo empa e le sehlopha se le seng, e le hore se tsebe ho fumana libolo tse ngata, ha tse ling tsona li fumane tse hlano. A re tse ling tsona li ne li ichoetsa pele liki e fihla pheletsong, e be ha ho sa tsebahala hore na libolo li feletse kae.

"Taba ena e ile ea re ruta hore re lokela ho ntlafatsa tsele eo re fanang ka tsona le nako eo re fanang ka tsona." A rialo a bile a eketsa ka hore ba tliil' o hlahloba palo ea lihlopha pele, ho bona hore na li kae ka palo mokhahlelong ka mong, ebe ha ba qeta ba fana ka libolo maqalong a selemo sa lipapali, 'me ba boele ba hlahlobe lihlopha hape mokhahlelo ka mong mahareng a liki le qeteleng ea selemo. "Selemong se hlahlamang re tla fana ka libolo ho lihlopha tse qetileng liki feela. Ha sehlopha se ka ichoetsa selemong se hlahlamang re ke ke ra se fa libolo." O boletse joalo. Ka ho le le leng, a re Sehlopha sa Naha sa Bolo ea Maoto se kenetse mekhahlelo e meraro ea lipapali tsa machaba e leng COSAFA, AFCON le ho phunyaletsa ho ea Mohopeng oa Lefatše.

Li nyolohela ho LWSP



Tšeliso Thakholi

Lihlopha tse peli tsa Bolo ea Maoto ea Basali e leng FC Stoko ho hlaha ka Leboea le Bokamoso College Ladies ea ka Boroa li nyolohetse mokhahlelong oa Liki e Kholo ea Basali ea Lesotho Women Super League kamor'a ho itsamaela bolacha ho lihlopha tsohle tseo li

neng li qothisana lehlokoa le tsona ho nyolohela Liking e Kholo.

Lihlopha tsa ka Leboea tse kenyeletsang bao e leng bompoli e leng FC Stoko, li ne li ile tsa bapala libekeng tse peli tse fetileng Lebaleng la DiFA, Maputsoe empa tse ling tsa lihlopha tsa hlahlela nyeoe moo li neng li tseka hore FC Stoko e sebelisitse sebakeng seo e seng sa

eona. Kamorao hore Komiti e Kholo e hlahlobe le ho mamela seboko sa balli, e ile ea etsa qeto ea hore lipapali tseo li phetoe Lebaleng la Bambatha, Maseru ka la 22 ho isa la 23 Phupjane monongoaha. Ke mona moo FC Stoko e neng e ntse ithomme pele lipapaling nakong ea ho feta, e ileng ea 'na ea boela ea e-ba eona mohloli ka Leboea.

Sehlopha sa Bokamoso College Ladies se hapileng maemo a pele ka Leboea se qala ho kena lihlopheng tsa Liki e Kholo. Athe FC Stoko ha e qale empa e ile ea tsoa lilemong tse peli tse fetileng tsa lipapali, ha e ne e reki-setsoa Lijabatho Ladies.

Puisanong le mothehi e bile e le mokoetlisi oa FC Stoko, Monghali Paul Setoko o hlahositse ba le motlotlo haholo haele mona sehlopha se khutletse kahar'a Liki e Kholo. A re FC Stoko ke sehlopha se sehlo kahar'a bolo ea maoto ea basali, 'me morero oa bona

o moholo ke ho tla holisa papali ea bolo ea maoto. A tiisa hore ba khutletse kahar'a liki ka sepheo sa ho tla kenela litholisano, ho sebeletsa hore ba ba kahar'a lihlopha tse 'ne tse kaholimo kahare ho liki.

A re ho tloha lipapali tsena li qalile ho na le libapali tseo ba khahliloeng ke tsona, 'me ba tliil' o kopana le batsamaisi ba tsona ho matlafat-

sa sehlopha sa bona. "Re batla ho tla etsa sehlopha se matla haholo seo morero joalokaha ke boletse e leng ho hapa liki e seng ho tla phomola." Ke eena eo.

Lihlopha tse theohetseng mokhahlelong o katlaase ke Rovers Ladies ea NUL le sehlopha se neng se sa tsoa kena liking ngoahola sa Mawes Ladies ea Butha-Buthe.



E tšoarela sepolesa thupelo

Tšeliso Thakholi

Mookameli oa Mokhatlo oa Lesotho oa Li-Olympic(LNOC), Monghali Morake Raleaka o butse ka molao mokhahlelo oa bobeli oa thupelo ea matsatsi a mahlano ea Liofisiri tse kholo tsa Sepolesa e tšoareloeng Olympic House, Maseru West ho tloha ka la 24 ho isa la 28 Phupjane monongoaha. Sepheo sa thupelo ke ho thusa liofisiri ho ntlafatsa lipapali kahare ho sepolesa le ho ichorisa litabeng tsa boetapele.

O boletse hore karolo ea thomo ea bona ke ho bebofaletsa Mosotho ka mong bophelo. "Ka lehlohonolo rona re fuoe ho batlang ho le monatenyana e leng lipapali." O boletse joalo. A re lipapali hore li re natefele li lokela li hlophue le ho tsamaisoa hantle ka meoloane eo ba teng ho tsona ba fihlelang tse lebeletsoeng ho bona.

"Ho ile ha khahla LNOC hore re tle kahare ho sepolesa kaha re utloisisa hantle thomo ea sona malebana le sechaba." Ke eena eo. H'a tsoelapele o bontšitse hore sepolesa ke setsi se nang le sechaba se sengata kahare ho sona, 'me se na le tokelo ea ho kena lipapaling le ho



Karolo ea liofisiri tsa sepolesa tse teng thupelong

fihlela sehlohlolo sa tsona. A tiisa hore ho na le linaha tse ling tsa Afrika moo ho seng ho e-na le lihlopha tsa sepolesa tse seng li emela naha le ho phunyeletsa ho ea li-Olympiking. A re e ka ba tlotla e kholo ha ho se ho ka ba le bonyane lihlopha tse peli tse fapakaneng ho tsoa kahar'a sepolesa tsa ka emelang naha

li-Olympiking.

Motlatsi oa Mookameli oa Sepolesa, SACP Ezekiel Senti o itse taba ea boikoetliso kahare ho sepolesa ke ea mantlha bophelong ba bona ba letsatsi ka leng, "hobane re mofuta oa batho o sebet-sang ka kotloloho le batho ba bang." A re taba ena ea sebetsetsa 'moho le litsi tse kang

LNOC ho tlatsetsa ka malebela, e ba tlatsa ka matla le ho nolofatsa mosebetsi oa bona. A re ho tsamaisa lipapali kahare ho sepolesa ke lelomolo kaha ho se mofuta o sieo oa lipapali kahare ho sona haholo tsena tse tsabahalang. A re batho ba lipapali ba makhetha ebile ha ba buoe haholo empa ba bontša ka talenta.

Lebitsong la barupeli, Monghali Posholi Posholi o itse thupelo ena e bohlokoa haholo tsamaisong ea lipapali, ka hona ba na le tšepo e kholo ea hore bosebeletsing ba bona ba tla fumana litsebo tse nepahetseng tse tla etsa hore ba kotule litholoana tse molemo, bakeng sa kholo ea naha le lipapali ka kakaretso.

Lipalami li kenela Tour de Maseru

Tšeliso Thakholi

Mokhatlo oa Lesotho oa Papali ea Libaesekele(F-CL), o ketekile Letsatsi la Lefatše la Machaba la Libaesekele Sethaleng sa Mopapa, Maseru ka la 23 Phupjane monongoaha, ka ho hlophisa mojaoo oa Tour de Maseru oa bolelele ba 10km le 20km ka sepheo sa ho tšoa ea lilemo tse 200 sechaba sa Basotho se thehiloe le ho keteka eona baesekele ka bophelo bo botle boo e bo etsang ho libapali. Mojaoo ona o ne o tloha Sethaleng sa Mopapa ho potoloha le libaka tse ling tsa toropo ea Maseru o fella moo o qalileng teng. Puisanong le Raliphatlalatsi oa FCL, Monghali Malefetsane Morie o boletse



khahlelo e fapakaneng e kenyeletsang lipalami tsa bahlankana le baroetsana ba U/14 le U/17. Ho feta mona o ne o boetse o kenetsoe ke lipalami tsa U/19 ho isa ho U29, mekaubere le liqhoku tsa papali ena. Ka holimo ho mona, a re ho ile ha boela ha e-ba le lipalami tse neng li qhoba ka bobeli ho ea tsoa khoe-leng. A khotaletsa banana le basali ho tla ka bongata papaling ea libaesekele kaha ba bonahala ba fokola haholo ka palo. A leboha bohle ba atlehisitseng letsatsi lena ho tla keteka le ho tla thaba 'moho.

Ba bang ba lipalami ba neng ba kenetse mojaoo ona, ba hlalositse hore papali ea libaesekele e ba thusa haholo bakeng sa boikoetliso e le ho fa 'mele bophelo bo

botle, e bopa setsoalle kaha ba kopana le lipalami tse fapakaneng, e bopa bonngoe le likamano tse mofuthu le batho ba bang. "E ka holimo-limo ke hore papali ena ea re hlabolla ntate." Ke bona bao.

Bahloli ho ba neng ba kenetse mojaoo ka bo-mong lebelong la 20km ke Phetsetso Monese, bobeling ea e-ba Potso Poshuli ha borarong e bile Mahooana Makatile. Ka ho baroetsana Thato Tlouoe o ile a hlaha mae-mong a pele ha bobeling e bile Pontšo Makatile. Athe lebelong la 10km ho ba U14 mohloli e bile Seutloali Morie le Mahase Makatile boemong ba pele le ba bobeli ka tatellano. Kaofela bahloli bana ba ile ba ikhapela mangolo le mehope.

Setsi sa libuka sa Mohlomi

Nthabeleng Seithleko

Litichere le baithuti ba bile ntsoe-leng hore tsebo le thuto li etsa moetapele ea hloahloa. Sena se hlahele-tse khakolong ea Setsi sa Bohahlauli le Pokello ea libuka ea Setsi sa Morena Mohlomi, Boqate Leisure Park, ka la 22 Phupjane monongoaha.

Tichere Lebohang Letšela, o itse sena ke mohato o motle oa ho ntlafatsa tsebo ea nalane, ka hona ba tšepisa ho sebelisa setsi sena ho intlafatsa. A re ba tla thabela hore bana ba bona ba likolo ba kopanele sebakeng sena, ho ithuta le ho ba le seo ba se etsang ho ntlafatsa thuto eo ba e fuoang likolong tsa bona.

O re ho bohlokoa hore baithuti ba ithute ka ho pharalla litaba tse etsahalang lefatšeng, e seng ba lule literateng ka matsatsi a phomolo le batsoali ba khotale tse bana ho ea libakeng tsa boithuto e le ho ba kenya moea oa thuto.

Dr. Tlohang Letsie, ho hlahla Sekolong se Seholo sa Sechaba (NUL), o itse setsi sa pokello ea libuka se tla thusa bana ho fumana thuto tse fapaneng le tseo ba li rutoang

kamehla likolong. O re hore moithuti a tsebe ka litaba tsa bophelo le thuto e

kholo e t'lo thusa ho matlafatsa thuto le ho phathahanya bacha ba phelang sebakeng sena. O

sena se t'lo ba thusa ho lula ba phathahane, ba matlafatsa litsebo tsa bona, ho ruteha le ho

libuka, liaparo le litaba tsa nalane. O re sena se tla thusa ho nyolla moruo oa naha.



A re setsi sena se buletsoe batho bohle ho tla ithuta, haholo bacha le baithuti ba likolo tse fapaneng ho ntlafatsa litsebo tsa bona hobane ke karolo ea sechaba ea bohlokoa, eo e tlo ba baetapele ba naha. A re ho bala ke tsela ea bohlokoa ea ho ithuta litaba tsa sechaba le kamoo li ka etsoang ka teng.

E mong oa bafani Lepheane Lesoli, o supile hore setsi sena se t'lo holisa linatla, tse tla tliša phetoho bophelong ba malapa le likolo ho thusa hore bohle re be le tsebo ea libuka e pharaletseng.

O ipilelitse ho sechaba sa tikoloho ena ho se sebelisa hobane motho ea balang o utloisisa bophelo ka tsela e pharaletseng. Ka hona a re e se eka ba ka behella lintho tse sa ba tsoeleng molemo ka thoko, ba bala ho holisa kelello le tsela ea ho nahana.

Setsi sena se buletsoe batho bohle haholo bacha hore ba bale le ho ithute litaba tsa bophelo khafetsa, hape se boetse se bohlokoa kaha se tla thusa ho amohela bahahlauli le sechaba sa tikoloho ena.

pharaletseng o lokela ho ikhaha ka ho ba le tsebo, a bale lipale a ithute bophelo ba linaha tse ling. A re thuto e fanoang likolong feela ha e'a lekana ka hoo baithuti ba tlameha ho sebetsa ka thata ho bona hore ba anetsa thuto ka litsela tsohle le hore ba atolose litsebo tsa bona.

E mong oa baahi ba Ha Fako 'Mamojaki Chonela, o supile hore setsi sena ke ntlafalo e

re bokamoso ba bacha ke thuto 'me ho tla thusa naha hore e be le baetapele ba nang le tsebo.

A re ho boetse ho tla ba thusa bacha ho hlola liqholotso tsa litlo tsa molao hobane ba khona ho phathahanga sebakeng sena. A tšepisa hore ba tla khotale tsa bana ba bona ho sebelisa setsi sena ho matlafatsa litsebo tsa bona.

Lebitsong la Baithuti Mpho Motšoari, o supile hore setsi

bona hore ba ikhaha joang ka litaba tsa linaha tse ling le ho matlafatsa bophelo ba bona. O re ho bala ho ba thusa ho ba baetapele ba kamoso ba nang le tsebo, boikemelo le kutloiso ea litaba tsa tsamaiso.

Mothehi oa sebaka sena Adv. Mokhetla Motšoari, o supile hore ba batla ho araba litlhoko tsohle tsa bahahlauli hore ha ba fihla sebakeng seo, ba fumane litlhoko tsohle joaloka

Nthabeleng Seithleko

Motlotlehi Letsie oa Boraro, o re esale sechaba sa Basotho se theoa lilemong tse 200 tse fetileng, se ntse se tobane le liqholotso tse ngata tse amang bochaba le seriti sa sona. Tse-na li hlahelletse puong ea hae, ha bula, lebota la nalane ea Basotho setsing sa Mabenkele sa Pioneer Mall, ka la 22 Phupjane monongoaha

O re boikopanyo ba Basotho ke bona bo thusitseng ho feny-ya bothata bona, kaha Basotho ba tseba hore sechaba sa khotso, bonngoe, se bopiloeng ka litšia tsa Moshoeshe. Lebota lena le bontša nalane ea Basotho le motheo oa nalane eo ba e arolelaneng.

Lebota lena le ahiloeng ke mafapha a fakaneng ke sesupo sa kopano le matla a Basotho, hona ke nalane e tla ruta, e tsosolose le ho kopanya sechaba lilemong tse tlang. Le tla boela le ruta bahahlauli ka nalane ea naha ea Lesotho, ho fana ka thuto ho sechaba sa Basotho le bana hore ba tsebe moo ba tlohang teng.

Letona la lipapali le Bochaba, Mohlomphehi Motlatsi Maqelepo, o supile hore lebota

Motlotlehi o bula lebota la nalane

lena la nalane ke ketsahalo ea bohlokoa kaha monongoaha sechaba sa Basotho se tla keteka lilemo tse 200 se thelole. Sebaka sena e tla boela e ba se seng sa libaka tse tla hohela bohahlauli ka litaba tsa naha ea Lesotho le bophelo ba bona.

Ho tla thusa ho fana ka thuto sechabeng, ka nako tsohle hore nalane e tsejoe, ho holisa bana ba itseba le ho bona litaba tsa ha bo bona li tsejoe mafatšeng a mang. O re ke nako ea hore Basotho ba tsebahale ka lineo tsa bona mafatšeng, ho ntlafatse le mekhoha ea bohahlauli litsing tsohle tse ka bolokang nalane.

H'a phethela o ipilelitse ho bacha le Basotho ka ho boloka nalane e phela libakeng tsohle molemong oa hore naha ea Lesotho e tsoelepele. A re ba ikemiselitse ho keteka selemo sena ka mekhahlelo eohle ea sechaba, boqapi le kholo ea bohahlauli molemong oa ntlafalo ea moruo oa naha.

E mong oa bahlophisi ba lebota lena, Kalosi Ramakhula, o supile hore morero oa pulo ea lebota lena ke o mong oa mehato ea nalane kahare ho naha ea Lesotho, e bontšang kopa-



no ea sechaba le phethahatso. O re hona e tla ba setšoantšo sa se thusang hore sechaba se ithute nalane ea Basotho le leeto la bona. Ho bohlokoa hore baithuti ba rutoe ka litaba tsa nalane, li tsosolose likolong ka liketso le ka lingo-

loa le kahare ho metse, ho thusa hore re be le sechaba se tsoetseng pele. A re batsoali ba nke boikarabello ba ho bona hore bana ba tseba nalane hore re be le sechaba se itsebang.

H'a phethela o itse nalane ke

motheo o motle oa bokamoso ba sechaba, se itsebang, se iqenehelang, se ipolokang, se etsang liqeto se shebile bophelo ba sona. O re ho hetla morao kamehla ke taba e kholo e thusang khahong e nepahetseng ea sechaba.

FARMERS PITSO AWARDS 2024



**HALALA! HALALA! HALALA!
OA LALA OA SAAALA!**

FAMERS PITSO AWARDS – a platform for celebrating individuals' or organizations achievements in agriculture, are back on the 6th and 7th September 2024 at the Manthabiseng Convention Centre in Maseru. Nominations are open. The aim is to shine a light on phenomenal work across the industry, recognise, and honour Basotho farmers with outstanding contributions to the agricultural sector. (See our Facebook page-Farmers Pitso for details on how to enter or nominate someone/oneself).

Sasai Econet Financial Services pledges M350,000 to Lesotho Defence Force's Youth Development Initiative

Maseru, June 25 – Sasai Econet Financial Services, a subsidiary of Econet Telecom Lesotho, has today presented a cheque worth **M150,000** to the Lesotho Defence Force (LDF) Youth Development Program.

This significant contribution forms part of the **M350, 000** pledge that the company made to support LDF's ongoing efforts to empower Basotho youth and address critical issues such as ill-discipline, and a lack of patriotism among young people.

The LDF's Youth Development Program mirrors Econet Telecom Lesotho commitment to empower young Basotho, through the telecommunications giant's social investment arm – Higherlife Foundation, which continues to invest in education by offering scholarships to the vulnerable and orphaned under the Capernaum Scholarship and the academically gifted under the Moshoeshoe I scholarship.

"We are honored to support the Lesotho Defence Force in their commendable efforts to empower Basotho youth with essential life skills, thereby contributing to their overall well-being and future success in Lesotho. By investing in programs of this significance, we are also contributing to the betterment of our society. At Sasai Econet Financial Services, we believe in the power of youth development as a cornerstone for national progress and stability," said Mr. Lehlohonolo Matee, acting GM-Sasai Econet Financial Services.

On his part, the Commander of the Lesotho Defence Force Lieutenant General Mojalefa Letsoela commented: "We are deeply grateful to Sasai Econet Financial Services for this generous donation. This support will significantly enhance our youth development program, enabling us to provide them with the guidance and skills necessary to become responsible and patriotic citizens. Together, we can make a substantial impact on the lives of our youth and the future of our nation."

The partnership between Sasai Econet Financial Services and the Lesotho Defense Force underscores a shared commitment to addressing some of the most pressing challenges faced by Basotho youth today. By working together, both organizations aim to create a safer, more disciplined, and patriotic generation that will lead Lesotho towards a prosperous future.

Sasai Econet Financial Services is dedicated to providing innovative financial solutions and supporting community development initiatives. The company is committed to fostering economic growth and improving the quality of life for all Basotho.

For more information, please contact the ETL PR office at 2221 1760.